

"TATA DI MUSICA MEXICANO NA ARUBA" SUPRIANO V.D. LINDE A RICIBI UN MERECIDO HOMENAGE...

** Diasabra siman pasa e popular musico riba tereno di musica mariachi, Sr. Supriano "Shon Lan" Van der Linde, concidera como e "Tata di Musica Mexicano na Aruba", a ricibi un merecido homage pa su 54 aña den e mundo di Farandula.

Esaki a ser celebra durante un grandioso anochi cu diferente shownan y canto den Centro di Bario Brazil.

Pa e ocasion especial aki e conocido figura di musica mariachi y pilar di e popular Mariachi Perla di Aruba, a ser honra cu presencia di Minister Glenbert Croes y Tico Croes, kendenan cada uno a honra Supriano Van der Linde cu un bunita plaquette. Tabata un lastima cu na e momento ey DEN AMBIENTE no por tabata presente.

Durante e grandioso anochi aki tabatin presentacion di Mariachi Los Imperio y varios cantantenan conoci den e mundo di mariachi,

kendenan a uni hunto riba un solo escenario pa rindi un merecido homage na e "Tata di Musica Mexicano" Supriano van der Linde.

Un show especial cu sigur tabata e atraccion di e anochi tabata e presentacion di e tremendo duo Yolanda v.d. Linde (su yiu muher) y Marcelino Paesch, kendenan a sorprende Supriano cu actuacion pa prome biaha dilanti publico, di nan yiu muher (nieta di Supriano) Cherida Paesch di 9 aña, kende den un forma esplendido a interpreta e cancion "Los Laureles", pa cual bunita presentacion e jovencita cantante a ricibi un ovacion serca e publico.

Tambe e "Tata di Musica Mariachi" a ser homenogia cu presentacionnan di Carlos Olarte (nieta), Vivian Kock, Benito Casuela, Luis Maduro, Danilo Vrolijk, Roland Angela, y e duo Abel Henriquez y Inocencio v.d. Linde.

Na final e popular can-

tor di Pueblo, Vicente Kelly, cu su acordeon acompaña pa Mariachi Perla di Aruba, a sorprende tur hende cu un tremendo cancion cua el a dedica como homage na Supriano v.d. Linde.

E cancion aki a cay na masha agrado serca e publico y ta vale la pena pa Vicente Kelly realiza esaki riba un produccion.

Na final di e sublime presentacion di Mariachi Perla di Aruba, kendenan a acompaña tur e cantantenan invita, e grandioso anochi dedica como un homage na Supriano v.d. Linde a sea den un broche di oro cu un tremendo fiesta bailable cu presentacion di "The Original Band".

Na final Supriano v.d. Linde a expresa na DEN AMBIENTE cu el a keda masha satisfecho di e gran anochi dedica na su persona, cual lo keda graba como un grato recuerdo den su curason.

Sin duda un merecido homage na un gran musico manera Supriano v.d. Linde kende a dedica 54 aña na e musica tan queri aki na Aruba cu ta Mariachi.

E personanan cu a traha incansablemente pa realiza e exitoso anochi aki



tabata Lourdes Geerman y Carlos Olarte, kendenan por ta orgulloso di un anochi sumamente exitoso.

Tambe DEN AMBIENTE no por keda di duna Vivian Kock su merecido credito pa su fantastico trabao realiza como maestra di ceremonia. E popularisima cantante y animadora di musica mexicano a hasi un bunita impresion como

maestra di ceremonia y nos ta spera den futuro di mira Vivian Kock mas riba escenario como M.C.

DEN AMBIENTE ta felicita nos "Tata di Musica Mexicano", Supriano "Shon Lan" van der Linde pa su 54 aña den e mundo di Farandula y alaves ta desee hopi aña mas cu su quitara español hunto cu su estimado grupo di Mariachi Perla di Aruba...

NOTI-AMBIENTE.

** Feliz dia y alavez tambe un placentero weekend cu yen di ambiente. Awe nos ta cuminsa despues di varios aña cu e seccion aki NOTI-AMBIENTE, pa asina duna bo e ultimo noticianan di farandula.

** Siman pasa e programa di Den Ambiente na Radio Galactica cual a ser transmiti vivo i directo for di Cheers Cafe tabata un exito rotundo. Durante e programa aki a surgi un discusion formal entre Anthony Gario di Formacion Taxx y Elsa Westerbουργ. Anthony a generalisa tur radio-emisora cu nan no ta toca e produccionnan local manera debe ser. Elsa a reacciona cu e no mester generalisa, ya cu Radio Galactica si ta promove nos productonan local manera debe ser. Na final Den Ambi-

ente a puntra Anthony si e ta scucha tur e radio-emisoranan, Anthony a declara cu e no tin tempo pa scucha radio.

** Mientrastanto awe merdia durante e programa di Den Ambiente na Radio Galactica, nos lo bay combersa cu nos Minister di Cultura Dr. Lili Beke Martinez tocante nos cultura musical. Lo bay ta presente John Jeand'or di ASOMA, Evelino Fingal di Instituto di Cultura, Joy Kock ex Presidente di ASOMA y ex trahador di Instituto di Cultura y Jubi Naar di DIARIO. Naturalmente e oyentenan tambe por yama y duna nan opinion, sugerencia etc na bienestar di nos Cultura musical.

** Diahuebs ultimo

porfin e produccion di Dhaddy Brokke y Boy Thode a ser bautiza. Dos aña pasa e produccion aki a ser graba den Aruba Recording Studio, na unda den forma di caracter di exclusividad y primicia DEN AMBIENTE a publica e foto di e grabacion. Ta trata di un joya di un produccion. Manera DEN AMBIENTE a pronostica for di inicio cu e pieza "Un biaha mas" lo bay resulta den un hit grandi. Pa e siman aki sigur e C.D. lo ser estrena na Aruba.

** Tambe e conocido cantante di antaño Rudy Plaate a lansa su produccion di un C.D. cu ta contene su hitnan cu sigur lo bay trese recuerdonan inolvidable. Pa otro siman DEN AMBIENTE lo bin cu mas informacion tocante e C.D. di Rudy

Plaate.

** Tremendo mes tabata e homage dedica na e gran musico ehemplar Supriano "Shon Lan" v.d. Linde concidera como e "Tata di musica mariachi na Aruba". Sin duda un bunita gesto di parti di Minister Glenbert Croes y Minister Tico Croes, kendenan a honra Supriano v.d. Linde cu un bunita plaquette.

** Mayan e agrupacion di Pueblo "Banchi Koolman y su Salsa y Sabor" ta bay celebra engrande nan segundo lustro cu un tremendo hapening na Yara Ranch. Ta spera un publico grandi na unda e ambiente lo ta sin igual. Un pabien grandi na Banchi y su Salsa y Sabor.

** Un Pabien grandi tambe ta bay na African Pride, kendenan a celebra nan prome aña siman pasa. Den Ambiente tabata invita, pero pa motibonan di compromiso di

ciere di e edision aki riba diavie nan anochi, e posibilidadnan no a duna pa ta presente, locual a duel nos profundamente.

** Mayan tambe den Cas di Cultura lo bay tuma lugar ripiticion di e fabuloso show "Mi Infancia" di e tremendo grupo infantil "Mi Preti Wowo". Den Ambiente a ser invitata pa ricibi un plaquette como aprecio, pero lamentablemente pa compromiso di Bingo, esaki no por ta posible. Pero ta aprecia e bunita gesto aki di curason, cual sigur lo bay haya un lugar especial den mi hogar.

**Tur cos ta "piek en fin" atrobe na Canal 90. Despues cu Den Ambiente a los e noiticia, den caracter di urgencia a pone un ruenion. Robert Geerman a haya loke e tabata desea y bira program manager. Hopi otro dj a bay busca trabao, pero mester bolbe warda.

Shonnan bay rustig te otro siman cu DIOS kier..